

Joint Press Release**Embaixada Japaun ho ONG JDRAC Selebra Serimónia Enseramentu ba Projetu
“Treinamentu Mekanikus no Operadores ba Veíkulus Pezadus no Máquinas
Konstrusaun iha Timor-Leste”**

10 Maiu 2023

Iha loron 10 fulan Maiu tinan 2023, Embaixador Japaun ba Timor-Leste Sr. KIMURA Tetsuya partisipa ona iha serimónia enseramentu ba projetu ho durasaun tinan tolu “Treinamentu Mekanikus no Operadores ba Veíkulus Pezadus no Máquinas Konstrusaun iha Timor-Leste”. Serimónia refere hetan mós partisipasaun husi Diretór Jeral ba Administrasaun no Finansas, Ministériu Obras Públikas, Sr. João Amaral, Prezidente IGEADI, I.P., Sra. Ermenegilda da Costa Laurentina, Prezidente ANAS, I.P, Sr. Domingos Pinto, Vice Prezidente EDTL, E.P., Sr. Humberto Pereira, Diretór Ezekutivu Interinu ANE, I.P., Eng. Julio Ricardo, Vice Prezidente JDRAC, Sr. Hiromichi Kawamata, no Diretóra JDRAC iha Timor-Leste, Sra. Yuu Yoshimori.

Dezde tinan 2020, ONG Japoneza, JDRAC, implementa ona projetu ne’e, ne’ebé Governu Japaun finansia ho montante 928,847 dolares Norte Amerikanu. Projetu ida ne’e ho objetivu atu hasa’e kapasidade trabalhadores husi Institutu Jestaun Ekipamentu no Apoiu Dezenvolvimentu Infraestrutura sigla portugues (IGEADI), Ministériu Obras Públikas, iha area mekânika no operasaun veíkulus pezadus no máquinas konstrusaun nian.

Projetu ne’e konsisti husi aulas no treinamentu, hanesan aulas bazika kona-bá sistema máquinas konstrusaun, treinamentu operasaun, treinamentu jestaun pesas nian (*spare parts*) no prátika reparasaun. Iha tinan ikus husi projetu ne’e, estajiárius sira hala’o prátika direktamente ba transportes no ekipamentus pezadus iha área sira ne’ebé veikulus hirak ne’e avaria iha munisipiu. JDRAC produz ona kurrikulu treinamentu, materiais no testes ba aulas no treinamentus hirak ne’e, bazeia ba padraun Japonezes nian ba abilidade iha manutensaun diária nian, rekuperasaun fallas no operasaun apropiada ba iha makináriu konstrusaun nian. Estajiárius na’in 41 husi IGEADI no Centro Nacional de Emprego e Formasaun Profesional Tibar (CNEPT), mak hola parte ona husi treinamentu ne’e, lidera husi formadores husi Japaun no dosente sira husi faculdade de Engenharia UNTL no DIT. Maioria dosente sira husi UNTL remata ona mestradu ou doutoramentu ida iha Japaun liuhusi programa ida ne’ebé finansia husi Japaun.

IGEADI iha transportes maiz ou menus hamutuk 180, inklui transportes 50 ne’ebé Forsa Auto-defesa Terrestre Japaun nian entrega ona iha tinan 2004. Governu Japaun no JDRAC espera katak IGEADI sei iha kapasidade atu atende demanda aas husi rai laran tomak ba manutensaun no konstrusaun infraestruturas nomós sokorru iha dezastre, liuhusi aplikasaun habilidades ne’ebé simu ona husi programa ne’e no utiliza mós veikulus hirak ne’ebé oferese husi Japaun.



From
the People of Japan

Joint Press Release

Durante serimónia ne'e, Sr. Embaixador KIMURA hateten, *“Ha'u hein katak formandu sira ne'ebé simu ona formasaun iha program ne'e sei aplika no partilla sira nia koñesimentu iha sira nia servisu fatin, no ikus liu halo papel importante iha dezvoltimentu infraestrutura iha Timor-Leste”*. Governu Japaun no JDRAC espera projetu ne'e sei fó kontribuisaun durável ba promosaun dezvoltimentu infraestrutura no resiliênsia dezastres naturais iha Timor-Leste.

【Remata】